





Sr. Herman Henep ta un persona cu no por cana, Esei ta bin dor di un sangramento den su lomba. E resultado ta cu el a bira parálitico y awor ta move den un rolstul, ta casa cu sra. Jutta Henep y e ta tata di 5 yiu. A pesar di su limitacion e tin un curason grandi y un deseo inmenso pa yuda hende.

Herman ta un docente, musico, cantante, compositor, escritor, poeta, conocedor di papiamento, y un persona dispuesto pa yuda na cualquier momento.

Herman di unda a nace e sentimento di yuda hende?

Mi ta un persona cu a lanta cu e sistema aki. Mi mayornan semper tabata cla pa yuda hende. Nan tabata contami, dia mi tabata grandi, cu na Aruba, antes hende tabata "Paga lomba cu lomba". Esei ta nifica cu awe ami mester di yudansa, tur mi hendenan ta bin yudami y mañan, ora nan tin algo, ami ta bai yudanan. E dicho a sali for di e cunukeronan cu mester a traha den cunuco y ora di cosecha, bo lomba ta sufri pasobra bo ta traha lomba dobla.

Dia mi a yega na edad pa scohe, mi a dicidi di bira docente, pasobra ei mi a mira e oportunidad pa yuda guia e hubentud den su caminda pa bira adulto. No solamente un persona cu educacion di scol so, pero tambe con pa trata hende na un manera drechi..

Tambe mi tabata gusta entretene hende en general y un di e miho manera pa haci esei, ta cu musica. Pesei un dado momento mi a lanta un trio cu a hiba e nomber TRIO CARIBE. Mi primo Eddy Clement y mi amigo Donny Boekhudt hunto cu mi a forma e trio. Nos tabata e prome trio den henter Antiya cu tabata canta den seis diferente idioma y toca diferente ritmo. Pesei nos tabata masha gusta. Nos a toca den misa, hotel, club, cas di famia etc. Na 1974 ami cu Donny a gana como Duo Caribe, e prome festival di cantica na Rotterdam, Hulanda. Despues nos a gana diferente premio den festival di cantamento. Nos a toca hopi pa e arubianonan y Antiyanonan na Hulanda.

Un otro forma pa yuda ta pa aporta na nos idioma papiamento cu dia pa dia ta perdiendo su

balor, pasobra nos hendenan mes ta hinca tur sorto di palabra di afo den dje. Conservando nos idioma mi sa yuda diferente hende pa coregi algo di texto pa nan, ora nan puntrami.

Tambe mi kier aporta na nos hobennan dor di skirbi un buki na papiamento, como cu tin masha poco literatura pa e hobenan. E buki aki a wordo uza pa diferente scol secundario, caminda e docentenan por trata e contenido(storia), pero tambe descripcionan di por ehemplo naturaleza. Y tin un tabu den e storia, pa tanto mayor como educadornan por uza pa trata y lanta discucion.

Awor mi ta trahando riba un otro buki y ta spera pa den 2004 mi por lans'e.

Mi ta gusta haci trabou caritativo pero mi no kier menciona ni ken, ni con, ni unda, pasobra no ta pesei mi ta haci'e. Lo ta bon si pa cada famia aki na Aruba, busca un manera pa haci algo caritativo pa nos prohimo. P.e. Yuda hende grandi pa haci respondi of algo den cas. Yuda mucha cu nan lesnan di scol, duna un hende un man ora mira cu e tin mester di dje. Etc.